

## Nasional

# Status OKU beri inspirasi bantu insan senasib

Prof Dr Ruzita mahu orang kelainan upaya disantuni, tak dipinggir

Oleh Asrol Awang  
bhnews@bh.com.my

**Kuantan:** Keterbatasan diri dan berstatus orang kelainan upaya (OKU) tidak menghalang Prof Dr Ruzita Mohd Amin membantu individu senasib yang sering terpinggir dan berdepan pelbagai kekangan.

Bagi Ketua Unit Kelainan Upaya, Universiti Islam Antarabangsa (UIAM) itu, status OKU sebaliknya memberikan semangat dan inspirasi untuk membantu golongan

ngan senasib dengannya.

Beliau yang lumpuh kekal sejak kecil selepas diserang demam panas, berkongsi kisahnya pada Siri Bicara Cendekiawan Mulia Kali Ke-13 anjuran Pusat Sains Kemaruan (PSK) di Universiti Malaysia Pahang (UMP) Kampus Gambang, di sini.

"Saya akur dengan takdir ilahi, tetapi status sebagai OKU memberikan saya semangat dan inspirasi untuk membantu golongan senasib yang sering terpinggir dan berdepan halangan termasuk



Wan Azhar (kanan) bertanyakannya sesuatu kepada Ruzita pada program Siri Bicara Cendekiawan Mulia Kali Ke-13 di UMP Kampus Gambang, Kuantan, semalam.

(Foto ihsan UMP)

sikap, fizikal, komunikasi serta sistem dalam sesebuah organisasi," katanya.

Katanya, semua pihak perlu memastikan golongan OKU yang terbahagi kepada beberapa kategori, iaitu kurang upaya pendengaran, penglihatan, fizikal, masalah pembelajaran, pertuturan, mental dan kurang upaya pelbagai, disantuni dengan baik demi kesejahteraan dan kebahagiaan bersama.

"Pelaksanaan Dasar Inklusif OKU bertujuan mewujudkan infrastruktur mesra OKU, budaya komuniti prihatin dan pembelajaran serta kehidupan kondusif," katanya menambah dalam konteks institusi pengajian tinggi (IPT), pihak pentadbiran perlu

menyediakan akses yang bersesuaian bagi menjaga hal ehwal pelajar OKU di kampus.

Beliau berkata, IPT juga perlu memantapkan kualiti hidup pelajar OKU supaya golongan itu tidak terpinggir, selain menyediakan kemudahan dan perkhidmatan mesra golongan itu serta pembentukan program pembangunan diri ke arah laluan kerjaya lebih terjamin.

Sementara itu, Naib Canselor UMP, Prof Dr Wan Azhar Wan Yusoff yang turut hadir pada program itu, berkata pihak universiti terbabit mewujudkan Unit Perkhidmatan OKU UMP (OkUMP) serta persekitaran kampus yang inklusif dan kondusif untuk OKU.

"Kami mempunyai pengalaman apabila menerima pelajar OKU dan menilai beberapa isu berkaitan keperluan golongan berkenaan. Malah, sejumlah RM50,000 disediakan untuk dimanfaatkan golongan ini dalam menjalankan aktiviti menerusi Tabung OKU di bawah Yayasan UMP.

"Agenda kesejahteraan warga kampus dalam Pelan Strategik UMP 2021-2025 yang memfokuskan kesihatan dan keselamatan warga akan turut memberi tumpuan terhadap golongan OKU di universiti. Selari dengan slogan 'Teknologi Untuk Masyarakat', UMP juga bakal melihat isu golongan OKU dalam kalangan masyarakat setempat," katanya.